



Fasnacht 2005

**J.B.-CLIQUE SANTIANS**  
Stammgesellschaft

## Färnseemetzgede

Me weiss scho syt de Brieder Grimm  
wenn de nid so scheen bisch, isch es schlimm  
In de Määrli griegsch vom Brinz e Schmutz  
wenn de wunderhibsch bisch – Gopfrid Stutz  
Bisch mehr ä mittelbrächtigs Wääse  
jä, denn gheersch halt zue de Bääse  
und die, do gits gar nyt z jammere,  
bliibe in der Bääsekammere!

Mit dääre Wyyshait isch jetzt Schluss  
dang em neyschte Färnsee-Schtuss  
Iber – I weiss nit wievyyl Sänder –  
wirds uusgschtraalt in de maischte Länder  
wie me uss de schlimmschte Drache  
e super Draumfrau oder -maa ka mache.  
D Idee kunnt nadyrlig vo de Yänggi  
Vo me ne operierte Hirni – dänggi  
Und lueg i mir die Wält so aa  
gitts vyyl von dääne z Amerikaa  
D Chirurge finde de Trend e Hit  
wills jeedi Mängi z verdiene gitt.  
Fyr d Scheenhait längt me dief in Sagg  
und vyyli makes – nit nur s Pagg.  
Bruuchsch e besseri Figur  
denn machsch halt e Korrektur  
Naase, Oore, Kinni, Bagge  
iberall gits eppis z zwagge  
d Bruscht, s Fuudi und d Lippe dien die Miettere  
mit Collagen loo underfiettere  
Fätt loosch absuuge, im Gsicht, am Ranze, im Gnigg  
oder bisch sunscht no naime z digg?  
Und häsch in dr Fassade Runzle sitze  
muesch unbedingt go Botox spritze!  
In der Färnsee-Biuty-Schau kasch alles luege  
Jede Schnitt, jedi Nooht und jedi Fuege.  
Gmietlig im Färnseesässel sitze  
und see wie me e Kiifer duet abspitze  
dasch doch e wunderscheene Oobe.

Dr Programmdiräggder isch nur z loobe!  
Worum verschnätzle si nit emol e Doot  
das wär doch au no guet fyr d Quoote  
Fir di näggschti Sändig mache mir doo  
e baar Vorschleeg, wär au no kennti koo:  
Vorab, zue de Frau Zanolari saage mir nit  
wills do nyt mee z rette git!  
Bim Blocher miestisch driber wache  
ass si d Schnuure nit no gresser mache  
Die neyi Basler Regierig hätti ä Grund  
fyr ä Faarbkorrektuur,  
rot-grien im Gsicht isch doch nit gsund.  
Oder dr ney Bredisänt vo de United States  
wie heisst er scho wyyder – s isch nit dr Gates  
A joo – Bush und Cheney, Rumsfeld und Rice  
bruuchsch nimm operiere – Giovanni scho waiss!  
Do blybti am Schluss no s Comité  
aber will die epper am Färnsee see?

Mit schlachte lieber im Saleweidli ä Sau  
das duet niemerem weh – und z ässe gits au  
und am Schluss dringge mir no ain yber dr Durscht  
wyl s ganzi Theater isch uns nämmlig Wurscht